

欽定剿平粵匪方略

欽定勦平粵匪方略卷六十 癸丑年

九月十三日 乙卯 僧格林沁奏言賊蹤竄擾州縣

皆由東北入京之路臣所統之兵乃都城屏障
蠡縣迤北無險可恃即使派兵往迎賊必東堵
西竄仍不能扼其東北繞突且兵分力單亦難
得力臣詳細籌思總宜暫在涿州駐紮聽候確
信如逆匪仍奔東北則涿州之兵正可迎截卽

使該逆繞過保定省城或東或西向京竄奔亦可迅速移營橫前攔截方免顧此失彼之虞總之北面之防關係至重臣兵不敢遠離京畿應請

飭下勝保先其所急相機繞出賊前合力攔截庶可杜其竄擾京畿奏入

上命軍機大臣傳諭勝保曰昨因賊陷深州蠡縣告急

降旨令僧格林沁等進駐保定與勝保等合力攻剿
本日據僧格林沁奏蠡縣迤北無險可恃所統之兵
總宜駐紮涿州不可遠離所見極是僧格林沁統領
京兵現駐涿州實爲京師屏障保定後路且足爲該
大臣北路聲援朕命將之意實在於此並非令該王
等代該大臣也直隸軍務一切仍責成勝保就現在
統領之兵酌量調度以一事權不必疑慮該逆於初

八日旣擾晉州復竄深州奔突無定著卽乘此機會
迅速前進其晉州賊匪分股是否西凌阿善祿等追
剿東路河間一帶必宜嚴防慶祺由鄭州馳赴河間
仍須該大臣派委得力大員協力截擊尤須扼賊東
竄天津之路隨時知照崇恩一體嚴防若餘匪窮蹙
竄至山東必須迅速追擊東省兵單皖省情形亦復
喫緊想該大臣全局在胷也賊匪奔竄剽疾其火藥

鉛丸雖沿途搶掠亦豈能如許之多著勝保密查如
有奸民暗中售賣必須設法嚴拏斷其接濟且屢次
擊敗賊匪遺棄贏馬器械等件安知非誘我兵奪拾
耽延藉得乘間逃逸種種奸計均須慮及切勿大意
上又命軍機大臣等諭崇恩曰現在賊匪竄入直境擾
及深州府保已山保定馳赴該處進剿恐逆匪被剿
緊急勢必窮而思竄東省與直隸接壤處處皆可關

入著崇恩懷遵前旨督同鎮道大員嚴密設防並將
運河渡口船隻盡數收集毋令逆匪偷渡東省團練
間尙認真並著傳諭各屬官紳合力守禦以助兵力
昨據李嘉端奏近有江西匪船下竄安徽廬州一帶
勢甚危急尤恐匪徒由皖北竄並著該署撫於江南
交界處所飛飭各該地方官一併嚴密堵禦盤詰奸
宄毋稍疏懈

同日桂良奏言前因河閒緊要飛咨倉場侍郎
慶祺管帶

盛京官兵迅速折回該侍郎已行抵趙北口擬由
鄭州趕赴河閒探明賊蹤迎頭會剿如逆匪徑
由豫河竄至天津再由水路折回計日當可趕
到勝保於十一日晚聞到省探得深州初八日
失守後賊踞城池本地鄉勇聚集萬餘人將城

圍困因無槍礮望兵如渴該大臣擬卽起程由保定屬之張登集一帶馳赴深州進剿令副都統佟鑑帶礮八位隨同前往至河間文武各官疊諭周密嚴防計已妥爲準備一俟慶祺兵到合力防剿當能得力保定官紳練勇頗爲足恃臣仍親率隨員督同在城文武巡防以期嚴密奏八

上諭曰深州鄉勇能圍困逆匪甚好然攻陷晉州之賊不可不防北竄

同日馬蘭鎮總兵慶錫奏言現聞賊勢猖獗竄擾畿南正定一帶不可不豫籌防守查

陵寢內圍之外自天台山左右延袤八九十里各營交界山嶺紛歧存兵無多不敷防守現將守護各營汛弁兵酌量調撥大小山口扼險駐守復調

牆子路都司田茂帶兵百餘名暫駐段家嶺巡防彈壓土匪惟古北口通永鎮現無實任提鎮駐紮可否

欽派大員暫署直隸提督以資鎮攝奏入

上命軍機大臣傳諭桂良曰署提督保恆帶兵遠出古北口本營操防緊要著桂良選派諳練營伍之副將前往古北口代辦提督事務以資控制本日該督奏

深州鄉勇圍賊情形已寄諭勝保等分投兜剿矣

同日呂賢基奏言據探初三日賊船千餘隻擁
進東關並由攔鼓山旱路分竄我軍退散李登
洲於初二日在黃落河接仗轟斃三百餘人我
兵亦傷亡二百餘人援兵不至退守芙蓉嶺六
安勇散回巢縣黃元吉所帶之勇亦均逃散玉
山見勢不支已於巳刻啟行赴含山臣思東關

係入巢湖一帶要口實爲廬郡門戶前經編修
李鴻章帶勇駐守四月有餘賊船並未敢闌入
玉山身膺總戎扼守此口並已釘梅花椿用船
裝石堵塞又有李登洲黃元吉等各帶鄉勇互
爲應援何以賊船擁進玉山卽行退縮請將玉
山李登洲黃元吉從重治罪以昭炯戒玉山可
否帶罪圖功出自

天恩奏八

上命軍機大臣傳諭呂賢基李嘉端曰玉山以專閫大員帶兵扼守隘口何以任令賊蹤闖入徑行他往著卽革職仍暫留本任責令帶罪勦賊李登洲黃元吉二員於賊船一至未能力挫兇鋒以致鄉勇四散均屬罪有應得著李嘉端查明叅奏皖省兵力尙單他省亦難徵調惟周天爵帶領兵勇可以移緩就急江

忠源自九江來援計日可到本省練勇亦可協助官兵該侍郎及趙昀等所辦團練已有成效且人數尙多務卽妥爲勸諭激勵令各該紳士等隨地堵截嚴密防守總以保衛廬巢遏賊北竄爲要

同日署山東巡撫布政使崇恩奏言初三日臣行抵東昌府屬莘縣接據探報逆匪由山西竄入直境查直東犬牙相錯之地處處皆可闖入

亟應層層堵截以杜分竄臣當由莘縣折赴臨
清州居中調遣分路策應曹州一路現有將軍
瑞昌統帶

盛京兵一千名駐紮該府所屬之濮州尙足以資
控馭惟臨清東昌德州等營存兵較少現調駐
兗州之登州鎮兵五百名駐曹州之高唐營兵
三百名並抽調省標弁兵二百五十名練勇三

百名飭令衆程來臨擇要堵禦新任糧道姚錫
華熟悉東省情形飛札該道就近督飭德州添
募壯勇與該署城守尉豐伸泰分駐邊隘竭力
守禦其東昌府屬之冠縣館陶等處卽札該府
王觀澄前往邊界扼要駐防館陶臨清德州等
境內衛河直達天津嚴札該州縣等將各處渡
口船隻盡數收入內港盤詰出入以杜逆匪由

聞

河路東竄仍確探直隸勦捕情形另行分別辦理奏入報

十四日丙辰勝保奏言臣於十一日探得逆匪分

擾安平蠡縣及距保定六十里之張登地方又查深州東南兩面大水賊難偷渡北面水小偏近饒陽泥淖可行西路無水界連安平祁州深

澤無極等處恐賊仍由此竄逸亟須四面兜剿
已派善祿由鄆州深澤馳赴深州西面擇要堵
剿西渡阿由束鹿赴深州西南面駐紮與善祿
作犄角之勢臣由張登安平直擣而南徑趨深
州督率各路兜剿至饒陽一帶已派吉林黑龍
江馬隊三百餘名前往遙作聲勢至慶祺所帶
盛京官兵業已飛催並遵派松玉前往河間與慶

祺商辦防勦事宜儘賊勢尙衆仍有不敷攻勦之處卽當咨商僧格林沁辦理奏入

上命軍機大臣傳諭勝保桂良曰逆賊竄踞深州明知大兵北面雲集乃敢分股北擾安平蠡縣及張登等處固因東南兩面水大難行亦難保非零星牽綴分我兵力現在賊衆約有若干何以擾及數處勝保旣督兵由省起程自可從北面進勦惟東南兩面雖有

大水仍不可不嚴爲堵截深州鄉勇圍賊之事是否確實如果民心齊一加以兵威自必更易得手保定省城防守事宜仍著桂良妥爲布置恩華奏帶之文武員弁卽著勝保察看分別去留

同日張亮基崇綸奏言粵逆攻撲江西省城屢經江忠源督兵擊退解圍後該逆水陸並進駛至廣濟縣屬武穴地方距田家鎮防所僅四十

餘里徘徊不前似欲以虛聲恫喝覘我動靜查
田鎮北岸爲黃州府黃梅廣濟蘄州蘄水各境
與安慶府及六安州緊接處處有路可通賊若
分股由陸入犯則直踞田鎮上游臣等現飭署
臬司唐樹義帶同前漢口同知張曜孫卽補同
知劉士哲主事胡大任等統領兵勇二千名馳
赴蘄黃一帶擇要駐紮廣發哨探如遇賊匪關

入卽便迎頭痛勦一面兼顧田鎮江防互爲倚
角奏入

上命軍機大臣傳諭張亮基崇綸曰楚省與江西安徽
接壤處所凡水陸要隘悉經派兵防守所辦均屬周
妥惟昨據李嘉端奏稱賊匪自占踞安慶後復有金
陵賊船數百隻駛入裕溪致東關失守廬郡危急已
諭江忠源迅速帶兵赴皖並令該署督等將改造戰

船速行挑選兵勇配齊礮位派員管帶駛往安徽交
江忠源以資攻剿賊情詭譎異常聲東擊西是其慣
技深恐江西金陵兩股逆匪直撲皖省復圖北竄其
竄楚之匪雖駛近田鎮仍徘徊不前是欲牽掣楚兵
使不能救援安徽已可概見著該署督等速將前項
船隻派員帶赴安徽並飛催江忠源迅速赴皖剿辦
萬勿稍有遲誤

同日陸應穀奏言查逆賊北竄直境勝保等帶兵緊追難保不復折而南竄臣抵衛輝因前調兵勇尙單添調祥符練勇八百名令庶吉士傅壽彤等管帶添募孟縣勇一千名臣自行帶赴彰德督同花里雅遜布蔣啟敷併力截勦聞安徽又有賊船一千餘隻停泊安慶城外添築土城意欲占踞永城一帶亦須防堵此時賊旣北

竄彰郡尤爲喫重臣自當先其所急速赴彰德
卿辦奏入

上命軍機大臣傳諭陸應穀曰賊陷深州現在大兵四
路兜剿難保不竄回豫境彰衛等處自應加意嚴防
該撫旣行抵衛輝添調練勇以助兵力著卽前赴彰
德督飭鎮道大員將界連直隸各要隘渡口分撥設
防並嚴飭地方文武不得擅離職守儻有藉詞逃避

各員弁卽行嚴叅以軍法從事至江西退回逆匪現
踞安慶復有賊船突入東關近徧廬郡已令江忠源
周天爵等帶兵前往應援惟皖省防兵單弱甚屬可
虞該撫現駐河北一俟直隸竄擾餘匪勦滅彰衛一
帶無煩防堵卽當分兵策應皖省不可稍分畛域

陸應穀又奏言據總理糧臺河南藩司鄭敦謹
等會稟揚州各營欠發兵餉撥款不敷找發須

撥銀五十萬兩豫備支放相應仰懇

天恩俯准添撥銀五十萬兩迅速解豫以資接濟奏入
得

旨戶部迅速議奏旋經戶部議覆於廣東等省如數撥
給解赴宿遷糧臺

上從之

同日長蘆鹽政文謙天津鎮總兵特克慎天津

道張起鵠奏言查天津前經團練義勇一千六百名現據紳士梁寶常等續練義勇四百名前後共計二千名逐日操演以資守禦又令運司劉向贊天津縣知縣謝子澄招募壯勇四千名臣等剴切勸勉曉以大義該勇等頗知感奮惟津郡存兵單薄臣等公同商酌葛沽大沽尚有兵一千九百餘名現擬酌調六百名協同防堵

海口留兵一千三百名足資巡防統計兵勇七千數百名所存器械無多已連日飭匠趕緊添造捐廉辦理臣等現將由海口調津兵六百名並選壯勇三百人派在西南水路扼要處所防堵其由省城衡水抵津水路至西沽虹橋係匯總扼要之區派天津存城兵二百名並新募壯勇一千名設礮分布防守其餘兵丁或令守城

或令在教場紮營聽調團練壯勇各令按段晝
夜巡防互相策應至勝保所奏火會壯勇亦由
天津府錢新和密爲傳知儘有警報卽迎向前
途齊心抵禦南來陸路亦暗爲布置遏其竄擾
至所調津兵現飭扼要駐守卽與出征無異 臣
等申明紀律如有擅離汛地及不遵調度臨時
退縮者均以軍法從事 臣等仍輪替駐守防堵

奏入報

聞

同日

上命軍機大臣傳諭奕興景瀄英隆舒倫保成凱盛壘
毓書華山泰富勒敦泰曰現在賊匪由山西竄出擾
及直隸京畿內外早經分設巡防並特簡惠親王爲
大將軍僧格林沁爲參贊大臣統領重兵以爲欽差

大臣勝保聲援妥籌布置惟賊情狡詐飄忽靡常被
勦緊急仍虞奔突必得豫籌準備方足以嚴捍衛而
固畿疆著奕興景瀄英隆舒倫保成凱盛燠毓書華
山泰富勒敦泰各於所管官兵內迅卽挑選精壯酌
定名數操演純熟並備齊軍裝器械火藥鉛丸聽候
諭旨一經調撥卽刻起程來京此係密旨思患豫防
該將軍都統副都統等務當不動聲色豫爲籌備斷

不可稍涉張皇以致訛言四起驚擾兵民其直隸境內攻勦情形及賊蹤所向並著隨時偵探以備不虞並各將挑選官兵名數先行具奏

十五日丁巳僧格林沁奏言已革理藩院尙書恩

華現奉

諭旨留於勝保軍營帶罪圖功自應馳赴勝保軍營聽候差委惟該革員現在行抵涿州經臣傳至大

營查詢該革員備悉逆匪情形可否暫留臣營
帶罪圖報之處出自

天恩奏入得

旨允行

十六日戊午恆春奏言查定州密邇直晉交界之

紫荊關長城嶺等處且距

西陵不遠臣派回省之綏遠城滿兵四百名太原城守

滿兵一百名交協領尙阿太統帶又派在省之
大同兵一千名派參將和昌統帶均交前任太
僕寺卿徐繼畬連伊所帶練勇三百餘名聽其
在紫荊關一帶派撥以扼要隘至固關一帶亦
關緊要臣另派兵七百名扼要防守遼州潞澤
一帶各隘口現均飭調重兵札令潘鐸督同防
堵奏入

上命軍機大臣傳諭恆春曰紫荆關等處係易州後路
必須於易州前面設防方爲周妥著恆春於所派防
守兵內酌撥一千名派員帶赴直隸易州並咨明秦
甯鎮總兵德春應於何路要隘布置卽行會商辦理
上又命軍機大臣傳諭德春曰現在賊蹤竄至深州紫
荆關等處係易州後路必須於前面設防方爲周密
已諭令恆春於防守兵內酌撥一千名派員帶赴易

州著德春察看地方要隘此項官兵應於何處布置酌量辦理

十八日庚申勝保奏言查該逆大股竄踞深州晉

州餘匪歸併深州經臣等督兵分路前進該逆

奔回深州城內臣先經知照西凌阿善祿加意

嚴防並令維祿經文岱暫守西路以杜回竄十

四日未刻該逆聞臣兵將到恐受圍困全股捨

命衝突復圖北竄西凌阿明慶魁福帶領馬隊
迎擊鏖戰兩時之久善祿由西北帶領馬步隊
橫衝而來西凌阿復奮力直衝前進時臣馬步
前隊亦已趕到三面夾擊該逆抵敵不住回馬
敗走我兵乘勢追殺十餘里賊匪盡匿城中不
出時已申刻我兵因未到齊不敢窮追撤隊回
營共計斃賊六七百名臣是日在深州正北距

城十五里之西午村地方紮營西凌阿紮營西北善祿紮營正西其西南一面令維祿經文岱紮營恐其兵力尙單是以分撥馬隊三百餘人前往協剿俟兵力稍集再當添撥其南路有水阻隔東路饒陽有團集鄉勇萬餘人堵禦武強尙有小路可通河閒者數處將臣所帶固原步隊撥往並派巴揚阿帶領馬隊前往扼截查探

賊情急欲奔竄東北兩路臣兵未到齊不能合圍惟有將馬步各隊分布各要路以防竄逸現在臣所帶已到之兵天津正定固原通永宣化及善祿所帶陝甘各營兵丁共二千五百餘名思華步隊七百餘名馬隊九百餘名西凌阿等所帶馬隊一千一百餘名維祿經文岱所帶官兵七百餘名統共已到馬步各隊官兵六千餘

名及臣所帶練勇五百餘名其蘊秀所帶直隸及

盛京官兵綿洵桂齡所帶陝甘官兵已過正定日內可到郝光甲董占元所帶官兵俱無到營信息所調後隊兵丁八百名由雙成德坤統帶計日可到正定托明阿所帶綏遠城土默特官兵落後未隨明慶前來臣業已催提速進現在恆

集之學問乃明卷十二 三十一
春屢次請撥擬卽催令前往由獲鹿赴山西聽
候調撥至河閒一帶有慶祺管帶之兵指日可
到臣已咨令相機前進扼要防剿儻賴

天威得以悉數殲除以靖畿輔是臣與在事諸臣私衷
竊幸者也

勝保又奏言賊於十七日丑刻撲出約計二三
千人橫分三股直撲大營先經臣密派馬步隊

分路埋伏以防賊至該匪果乘月色前來勢甚兇猛經派出吉林黑龍江西安馬隊抄殺斃賊多名賊竟不退臣親自出營指麾步隊分投轟擊並經佟鑑督率礮營兵丁施放大礮賊始披靡經馬步隊追趕斃賊約一二百人生擒數名正法伏思逆賊當此困處之時進攻正易得手各路未到官兵已差弁催提專待綿洵桂齡蒞

秀等官兵到來分撥東西兩路使賊無處可以分竄以便由北而南三面齊剿冀殄妖氛奏入

上命軍機大臣傳諭勝保西凌阿善祿曰逆賊因踞深州糧藥俱盡正可乘此聚而殲旃該大臣現由北面進剿西凌阿善祿等扼其迤西一帶巴揚阿分扼武強等處小路係在該州迤東惟正南一面細閱所奏竟似恃大水爲險固因催兵未齊一時不能分撥扼

守然逆賊捨命衝撲焉知不窺我北路兵多又圖南
竄該大臣仍當密探嚴防或豫爲設伏或多設疑兵
使之無隙可乘方臻完備綿洵桂齡蘊秀所帶之兵
計期當可趕到郝光甲之兵並明慶所帶綏遠城土
默特落後之兵均著飛催前進若令全數到齊儘可
分扼南面此股逆賊卽責成勝保西凌阿善祿等迅
速圍剿一切布置切勿延緩

同日湖北提督向榮前長蘆鹽運使彭玉雯奏
言臣向榮自奉

命圍攻金陵偏營城下或明攻暗襲或聲東擊西大小
三四十戰斬擒旣多解散者亦不少無如該逆
以固守爲能不肯輕出冒險其詭譎之謀無非
以不戰坐困我師良由賊於長江上下有船來
往可以四出擄掠接濟無窮如此則欲制賊死

命非先清江面不可臣向榮前欲改商船爲礮船以資追勦奈江船之大者盡爲賊壩故疊次奏調上海礮船廣東水師拖罾戰船來江助勦並屢次催調鎮江水營礮船上駛原冀堵截中流該逆不能揚帆上下任意四竄詎水師各鎮將或以風色不順或以江面窄淺爲辭多方藉口遷延不進現聞廣東拖罾到上海者三十

二隻紅單船到廈門者三十四隻臣一面催調
拖罾紅單暨鎮江艇船駛赴上游又一面趕鑄
三萬斤大礮令虎嵩林帶領順道先攻鎮江自
易得手再以鎮江得勝之師與臣分扼金陵之
東北以江西江忠源得勝之師扼其南以河北
勝保得勝之師扼其西以各戰船結水營於上
游扼塞大江則該逆之救援可斷大軍之犄角

已成彼時四面兜剿元兇立可授首應請

皇上飭下勝保江忠源迅速南來以期一鼓成擒奏入
上命軍機大臣傳諭向榮曰金陵鎮江被賊占踞半年
有餘雖疊次勦辦獲有勝仗而該逆負隅如故老師
糜餉朕心焦慮時深現在賊匪由山西竄入直隸經
勝保悉力窮追正在喫緊之際斷難分兵南向前因
安徽賊踞安慶進逼廬州屢飭江忠源趕緊赴援須

俟皖省勦辦就緒方能移兵協勦此時江南軍務該大臣責無旁貸惟有設法肅清江面斷賊接濟前命廣東督撫雇備拖罟船百隻快蟹船數十隻駛赴江南並令購備洋礮解至武昌配船運往會合夾擊復經張亮基奏買船改造戰艦兼備中船小船共四百隻駛往下游此項船隻曾諭令先儘所有交江忠源飛催赴皖協勦但爲數較多其續行改造成就者該

大臣亦可咨調應用其紅單船隻此時定已開行該大臣亦可飛札迎提與鎮江艇船並新鑄大礮卽分布江路斷賊往來接應與陸路兵勇夾擊該大臣當迅籌克復兩城毋再因循株守徒糜餉需

十九日辛酉周天爵奏言查臣所帶官兵二千名

除派往廬州五百名又派在永亳一帶勦捕捻匪一千名外其留守固鎮者祇曹州兵五百名

臣赴穎僅帶二百名兵力本單奕經帶兵一千駐守徐州兼護宿遷糧臺均係緊要指日揚城賊匪食盡潰圍而出徐宿又當揚賊之衝淮北並無重兵祇有臣與奕經李嘉端三路偏師而皆爲賊所必爭之地前奉

諭旨以徐宿中路責成臣與奕經二人臣所領千餘兵實難再行分派況廬州裕溪與關山二處形勢

可戰可守而鳳陽合肥民俗强悍非無勇可練
關山兩面峻嶺一道峽溝本毋容多駐官兵但
祈

飭下廬鳳道鳳陽府再團練勇扼守險要埋伏礮位逆
賊斷難長驅闖越至安慶之賊前此不直闖廬
州而但至無爲州者緣無爲州之運漕鎮據巢
湖水口爲漕糧及米商匯集之區賊船先至運

漕鎮將漕糧插旗封住不許居民輕動該州林
蘭亦卽不敢運動並聞稟明撫臣及賊大夥再
至將積漕十六萬石全運江甯使當賊窺漕鎮
之時大吏卽先帶兵募勇扼守裕溪口何至藉
寇兵資盜糧江甯之賊益盤踞而不肯去此不
守巢湖裕溪口之失策也至集賢關在萬山叢
中爲官兵藏身之區可以避賊而不可攻賊現

在賊踞廬江何難由舒城至合肥指日繞出關
背官兵駐守無益於事此守集賢關不守安慶
廬江之失策也臣通籌皖省大局不在增兵增
餉而在有調度之大員與得力之將領苟得其
人則廬鳳壽春等處練勇一呼而數萬可集巢
湖口清流關之險隘守以千兵可遏萬賊奏入

上命軍機大臣傳諭周天爵曰該侍郎因徐宿中路緊

要與奕經分防揚城竄匪兵力難以分撥賊匪現竄
巢縣窺伺廬郡情形亦甚緊要若廬郡稍有疏失賊
勢益熾該侍郎應如何派撥兵勇應援仍須移緩就
急妥籌保衛之策以慰朕念

上又命軍機大臣傳諭江忠源曰朕因李嘉端毫無布
置已將該員革職並授江忠源爲安徽巡撫馳驛前
赴新任矣現在廬州情形萬分緊急江忠源諒已行

抵皖境接奉此旨後卽探明賊蹤所向相機勦辦賊
踞安慶築城空濠復分擾巢縣等處欲撲廬州難保
非意圖北竄該撫深悉賊情畀以封疆責無旁貸務
當統籌全局迅殄賊氛又據周天爵奏賊船先至運
漕鎮將積糧十六萬石插旗封住不許居民輕動該
知州林蘭亦卽不敢運動稟明撫臣及大駭再至將
糧米全行運往江甯如果屬實尙復成何事體著江

忠源查明迅速具奏

上諭內閣曰安徽巡撫李嘉端自到任以來毫無布置致逆匪竄踞安慶無爲州巢縣等處均被蹂躪實屬調度乖方有負委任李嘉端著卽革職安徽巡撫著江忠源補授未到任以前著劉裕鈐署理

二十日
壬戌

上命軍機大臣傳諭僧格林沁曰昨據勝保奏連獲勝

仗現在逆匪困踞深州糧藥將盡正可乘此機會一
鼓殲除但恐勝保軍營兵力尙單不能四面兜圍此
股賊匪一日不滅則涿州大兵一日不能撤防朕與
惠親王等商酌仍須添派精兵速往助剿著僧格林
沁於所帶兵內迅卽派撥京營官兵二千名察哈爾
馬隊一千名剋日派委大員管帶前赴勝保軍營聽
候調遣

上又命軍機大臣傳諭勝保曰現在賊匪困踞深州必須及早殲除昨據該大臣奏軍營兵力尙單不能四面兜圍東南一帶甚覺空虛本日已諭令僧格林沁派撥京營官兵二千名察哈爾馬隊一千名迅速前赴深州軍營聽候調撥此項官兵三兩日內即可趕到著卽擇要布置乘機圍攻痛加勦洗萬不可任賊紛竄此時兵力不爲不厚該大臣務當乘此機會與

西凌阿善祿等迅圖圍剿一鼓蕩平毋稍延緩

同日巡防王大臣奏言本日奉

旨著僧格林沁軍營派撥京兵二千名察哈爾馬隊一千名迅速前赴勝保軍營所有僧格林沁軍營應如何添兵之處著妥議添撥等因欽此臣等擬將哲里木盟馬隊一千名熱河兵五百名古北口兵四百名撥往僧格林沁軍營以資防剿奏入

上從之

同日

上命軍機大臣傳諭向榮許乃釗曰自逆匪竄踞金陵已逾半載未能剋期收復朕宵旰焦勞無時或釋因念向榮帶兵以來將弁中奮勇打仗者頗不乏人卽如湖北紅山之役一日破賊十三壘到金陵後連破賊壘七橋礮一仗尤爲出力在該大臣以賊匪未平

金陵未復不敢遽行保奏然從征將弁日久勤勞若不量加獎敘何以激勵戎行該大臣前保之副將德安瑞格明安秦均經朕簡放總兵此外軍營各員疊次打仗殺賊尤爲出力者著向榮許乃釗秉公酌覈保奏候朕施恩總期無濫無遺以作士氣此旨著宣示軍營俾咸知感奮仍著該大臣等激勵將弁迅圖克復埽穴擒渠以副朕望

同日

上諭內閣曰著添派戶部尙書孫瑞珍刑部左侍郎羅惇衍辦理巡防事宜

同日

上諭內閣曰自粵匪竄擾以來地方文武官員或守城殉節或臨陣捐軀及紳士人等志切同仇盡忠效死者業經立沛恩施交部分別議卹並將被害較烈各

員命於各該處建立專祠以昭忠節該官紳等忠義之氣允堪振起懦頑褒卹之典仍宜特從優厚著該部詳細查明已經給予卹典者再行分別酌議加增予諡或入祀昭忠祠其家屬殉難者應如何優卹之處一併酌覈具奏至未經奏報各員著各該省督撫迅卽飭查被害情節奏請獎卹勿稍疏漏用示朕勵節勸忠之至意

上又諭內閣曰前經疊降諭旨令各直省辦理團練該督撫等諒已督飭所屬各就地方情形妥籌辦理朕聞江南附近金陵各村社及揚州迤東各屬均能練勇自衛江西興安縣壯勇亦能將竄擾賊匪盡數殲斃可見辦理認真自有實效昨據勝保奏饒陽鄉勇集有萬人復據巡防王大臣等訪聞該縣督辦甚屬認真似此實力奉行自可爲民禦災捍患著順天府

府尹直隸總督嚴飭所屬各州縣迅將團練事宜妥
速遵辦並著派委大員覈實查勘如果辦理周密與
論允洽卽著據實保奏候朕施恩若因循藐玩或致
滋生弊端並著嚴叅懲辦至近畿一帶各村鎮距城
遙遠難保無奸細潛蹤著卽飭令地方官出示曉諭
如遇有外來賊夥准該紳民人等格殺勿論有能擒
殺賊目及長髮賊黨者均著報明地方官詳請優加

獎勵以昭激勸